

Woarde uffs Chriskindsche

Weihnoachdsfiewer! Glocke klinge,
em Radio doon se Lierer singe.
Em Ofe brozzeld de Weihnoachdsbroore;
me nommes oo, e ess gerooore.
De Hond will oo die Plätzischen,
e springd groad uff de Desch,
die Mamme mäschd dem Hondsvieh nooch
un dood debei Mordskresch.
De Babba muß die Kenn ermahne,
dann däi mache als Grafame.
Sie nerjele un doon sisch necke
un hinnerm Vierhang sich vestecke.
Es Woarde ess aach e Tordur;
wu bleibd dann es Chriskindsche nur?



Die Oma suchd ihr Lesebrell,
sie mauld alsford un murmeld,
dann stombd se sisch aach noch om Desch,
doaf se groad su durmeld.
Doo wird de Babba ärjerlich
un dood aach emool flouche:
"Die Schloachsbrell setzd der uff de Noas,
de brauchsd se näid se suche."
Doch die Oma gebd näid uff,
sie hod en stoarke Welle,
sie gebd em Babba gleisch aans druff:
„De brauchsd näid su se brelle!
Heud se flouche, doas es schlemm,
nomm disch sesamme vier de Kenn!"
Doch däi hun beim Brellestreid
ihrn Spaß, un es vegiehd die Zeid.
Dann wirts stell, me dood sisch besinne,
un die Beschierung kann beginne.
Jetzt wärn die Päckchen uffgeresse,
es schiene Babier uff en Haufe geschmesse.

Die Kenn juchze, die Iwwerraschung kimmd oo,
jetzd ess de Babba merrem Auspacke droo.
E guckd ens Päckche, dann sääre ganz trocke:
"Ei, Gewirrer, Schlips un Socke !"

Die Oma hod en Baldin kräijd,
doch die Foarb gefäld ihr näid
"Die Woll ess zou rauh," hierd me se sache,
un helle Foarwe deed se näid trache.
Die Mamme freud sisch iwwer en Ring,
den had se lang schun en ihrm Sinn.
Die Kenn hun ihr e Bild gemold,
doas hod se stolz eviergehold.
"Ach," sääd se und se ess geriehd,
"woas hoabd ihr misch su schieh beschierd!"
Sie dreckend e Treensche un giehd en die Kesch,
dann brengd se es Festmohl uff de Desch,
vegesse sei jetzd Moih un Plooch.
Gekrädschd wird nooch de Feierdoach!

